



驚心駭目

名幕公牘大全

上中丞辯討貓檄書

沈桐威

吳郡沈桐威起鳳諧譯一書膾炙人口聊齋志異以外罕有匹者內載討貓檄一篇語帶譏諷時撫軍好佛因此有搆蜚語者朱石君先生時官安徽巡撫欲劾之

桐威上書自呈筆墨飛舞石君先生憐其才事竟釋今錄其書云

鳳吳下阿蒙蘆中窮士幸一丁之初識笑二酉之難窺家少曹倉長訛亥豕腹無邊笥學注虫魚慕辨稻之深才幼漸左癖羨食瓜之徵事長愧書淫偶拾齋人炙穀之遺忘附虞卿著書之事晨繼夕寫塗欲成鴉東撮西抄祭還類獺蘇學士香花供佛補錄傳人淮南王雞犬皆仙文探寶笈夢迷鄭鹿稍參太卜之書鬼嘯阮琴用輔睽車之志以至賣柑種樹盡被搜羅相馬捕蛇亦資談助傳成毛穎中書君原屬寓言賦本子虛亡是公何關實錄竊秋水馬蹄之義託雪泥鴻爪之詞敢希舌可生蓮差信胸堪成竹方謂客嘲賓戲古人一廢談諧幾忘馬磨牛衣雜說



名幕公牘大全

東京大學
東洋文化研究所所藏
漢籍善本全文影像資料庫

書名 驚心駭目名幕公牘大全一卷
撰者 清 張之洞等 撰
卷 冊一
內容分類 史-政書-雜錄
索書號 大木-法類-獄訟-斷獄-15
編號 B4045300

[彩色首頁1](#)

[東洋文化研究所漢籍目錄 編號: B4045300](#)

[東洋文化研究所漢籍目錄所藏漢籍善本全文影像資料庫 索書號: 大木-法類-獄訟-斷獄-15](#)

[漢籍善本全文影像資料庫文本驚心駭目名幕公牘大全一卷](#)


版權所有: [東京大學](#) [東洋文化研究所](#)

[使用上的注意事項](#)

歷代名幕公牘

刀筆大全

希翁署檢



名人公牘大全

老惠題



欽定四庫全書
名幕公牘大全



駭目

名幕公牘大全目次

上中丞辯討貓檄書.....沈桐威

勸借商款公牘.....樊樊山

飭屬卹孤之札西安府.....樊樊山

不忍訟累之移文.....樊樊山

與江岷樵論勦匪書.....左宗棠

彈劾欽使辱命請正法疏.....張之洞

到宜川任觀風示.....樊樊山

復本府問絕糧書.....樊樊山

忘動公帑之咨文.....樊樊山

彈劾閣臣請賞舉人疏.....朱侍御

警勸屬下之牌示.....樊樊山

調停南北當商爭執論……………樊樊山
 監生上控官書局委員詳文……………樊樊山
 彈劾李蓮英等三凶罪狀……………沈北山
 彈劾李鴻章罪狀……………史維峻
 彈劾魏忠賢罪狀……………楊 漣
 彈劾嚴嵩罪狀……………楊繼盛

驚心 名幕公牘大全

上中丞辯討貓檄書

沈桐威

吳郡沈桐威起鳳 諧譯一書膾炙人口聊齋志異以外罕有匹者內載討貓檄一篇語帶譏諷時撫軍好佛因此有構蜚語者朱石君先生時官安徽巡撫欲劾之桐威上書自呈筆墨飛舞石君先生憐其才事竟釋今錄其書云
 鳳吳下阿蒙蘆中窮士幸一丁之初識笑二酉之難窺家少曹倉長訛亥豕腹無邊笥學注虫魚慕辨稻之深才幼漸左癖羨食瓜之徵事長愧書淫偶拾齋人炙穀之遺忘附虞卿著書之事晨繼夕寫塗欲成鴉東撮西抄祭還類獺蘇學士香花供佛補錄傳人淮南王雞犬皆仙文探寶茂夢迷鄭鹿稍參太卜之書鬼嘯阮琴用輔睽車之志以至賣柑種樹盡被搜羅相馬捕蛇亦資談助傳成毛穎中書君原屬寓言賦本子虛亡是公何關實錄竊秋水馬蹄之義託雪泥鴻爪之詞敢希舌可生蓮羞信胸堪成竹方謂客嘲賓戲古人一廢談諧幾忘馬磨牛衣雜說

難登著作享千金之敝帚玷五夜之寒氈今蒙鈴閣垂詢琴堂傳命始悟雕虫小技多亦奚爲捫虱高談戲終無益華國惟文章是寶立言以信道爲宗陶令閒情不入梁樓之選魏家穢史難參魯壁之經小慧卽畔道之謀大言實欺人之習乃大人不加譴責反賜栽培想因采及藜藿亟欲裁其狂簡曩謁小程夫子許參立雪之班今望大宋門牆願侍披香之席雖雲泥勢隔附驥無緣而風雅道存登龍有路昌黎伯招生館下星甬盡得其真詮廬陵公持節寰中劉幾自裁其僞體金能躍冶不棄塗間桐可爲琴終收爨下說菩提法沛甘露於犁舌獄中開理學門沐春風於傳心座上自愧半生精力悞盡浮華反幸數卷蕪詞得邀提命從此悔其少作不再續搜神志怪之書還期知所折衷庶無負振聵發蒙之訓

勸借商款公牘

樊樊山

啓者光緒二十年九月奉藩憲示諭以倭氛不靖籌餉孔殷奉旨息借紳商銀兩以濟急需所有加息票借及分限歸還各章程均經出示曉諭在案吾邑諸君子

想皆習知而熟睹矣本縣歷宰各處從不捐人一錢久爲邦人所信此次事關國計與邑中些小公事不同暫借卽還而且七釐加息更與從前抑勒寫捐者不同本縣承辦此事又與他人不同固知諸君子之踴躍從事也惟查向來勸捐俱由書役長班開具富戶姓名由縣具簡邀請將命者上下其手百弊叢生本縣深知而深惡之因念蒞任年餘於地方情形早已熟悉耳紳民之殷實者不待舉報早十得其八九在他人買菜求多動謂集腋成裘聚沙作塔由數千金以至數金數十金靡不搜括而不知其昧政體也今本縣不問之書差不謀之紳士不下帖請客不爭多論少但憑我所素知者自百兩起至六百起止皆量其家道之豐儉使持出者毫不爲難而於公事亦復有濟親筆書寫於各人名下分註勸借數目蓋用樊山小印分爲四單使長班分投送閱諸君子見單以後各於本名銀數之下簽一知字卽算定局統於臘月望前將銀送縣由本縣一面解交藩庫一面請領印票分給諸君收執屆期取償決無失誤如竟失信自有本縣承當鄙性最喜爽

捷似此辦法。自覺便利無比。若諸君尙復遲疑。委員一到。邀勒至縣。面議多寡。必不能如本縣之體恤也。朝命諄諄。萬難違抗。單到書知。不勝翹切。

飭屬卹孤之札西安府

樊樊山

札西安府知悉。案照光緒三十年正月十一日。鳳邠鹽法道鐸物故。一妻一妾。有待於正名三男三女。同傷於失怙。公私有千金之累。囊橐無一錢。可名襲以薄財。歛以時服。傷哉貧也。禍莫甚焉。二十一日。側室告逝。長男少女同日而殤。一句之內。四喪在庭。六時之中。三棺並舉。殃咎集於一門。天乎。何忍親丁。僅餘五口。命也。如何行路。增歎。矧同舟之價契。廣庭集議。賴中座之施仁。卹以千金。提諸閒款。官逋暫了。私責猶多。兒女長號。丁幕靡適。留此一日。需一日之饗殮。去此一程。耗一程之資斧。釀金不力。歸匱何資。省城自撫憲以次。既已各致賻儀。省外之優缺優差。誼當仗助。秦中官况不佞。深知量其力之所能爲。勉以情之所當盡。今由本司留腴去瘠。酌盈劑虛。計差缺若干處。共派奠分若干兩。盡小范卹孤之義。人孰無

情。仿浩翁硬派之差。余非得已。合之省門贈贈足四千金。至鳳邠兩屬之寅僚。及奉直八旂之鄉誼。未經本司攤派者。有無聽便。豐齋隨人。貴府高義。飭雲廉泉。潤物中歲。久傷於哀。樂同官。永念夫存亡。甚賴同心。成茲義舉。合行飭札。札到仰卽函致單開各府縣及各釐局。各分清俸。惠此孀孤。總期回旂尙有餘糧。就道別無膠葛。惟是扶棺期近。深虞執紼來遲。所有攤派奠資。先由司庫墊發。卽飭各員迅解歸歎。勿稍延誤。嗚呼。脂膏爾祿。慎勿貢諸豪貴之門。冷暖交情。正可驗於死生之際。馳書徧告。垂涕何言。此札。

不忍訟累之移文

樊樊山

爲移覆事。案准貴縣八次專差。關提做縣民人袁讓兒夫婦到案。隨卷查此案。於光緒十二年四月內。准貴前任移開。奉臬憲批。訊孀婦王楊氏。即楊王氏。上控王有信等案內。娶主袁讓兒到縣。據讓兒供稱。十一年八月初六日。楊王氏在渭南將伊具控有案。希將卷宗速移過臨等因。准此。旋經敝前任檢卷蓋印移送。訖自

十二年至今。王楊氏蔓訟九年。袁讓兒王金氏被關八次。十九年三月。由敝縣移解備質。旋經貴縣重訊。因楊太平等未到。諭令讓兒夫婦取保回家。事隔年餘。復准移開。除關催楊太平等到案外。擬合專差關提等因。是楊太平等到案與否。尚不可知。若遽將讓兒夫婦傳解。又屬徒勞往返。况王楊氏初控者。王有信也。繼乃添控楊太平。繼又喊控賈二得。隨時變幻。任意增添。其為持婦圖拖。已可概見。袁讓兒出錢娶婦。理無不合。而十年之內。訟累無休。實不忍再行傳解。若王楊氏必不肯休。則該氏亦敝縣之原告也。祈即將該氏及敝縣原移卷宗。一併賜文。分別移解過渭。以符禮尚往來之義。為此合移貴縣。請煩查照施行。

與江岷樵論勦匪書

左宗棠

瀏陽之徵義堂。在該縣下東鄉。距縣四十里。其恃眾強橫。事非一端。特未敢顯行悖亂耳。粵賊攻城時。曾遣人密約其首周國虞。糾黨幫助。周末遽應。而其素仇王氏。遂欲因此構陷其罪。周國虞畏懼。遣其姪帥眾三百入城。託名保衛庫獄。且藉

以自明。非食賊黨。又師曹瞞挾漢獻之故。智使王氏不得仇己。其立心不過如此。徵義堂之人。良莠不一。有曾世珍鄧萬發者。遂糾眾焚燬獅山書院。殺廩生王應蘋。并乘機搶掠各富戶財帛。奸淫子女。無所不至。縣令趙君慈柔得民。然庸懦姑息。無剴斷之才。惟務苟且了事。屢使西南北三鄉紳耆為之和解。迄無成說。周國虞畏罪藏匿不出。鄧曾二兇恐黨散勢孤。不為大府擒治。必遭白沙團眾報復。因立議必允其帶夥黨一二十千人投效。始肯息事。趙令計無復之。亦欲大府姑從所請。殊不知曾鄧二兇。所以不敢妄動者。原懼官兵剿辦。與白沙團之徐擬其後耳。今既允其投效。則白沙團眾不敢與之為仇。兩兇與其黨一二十千人。嚮來官府亦不能置之於法。是我終無如兩兇何。而徒以失白沙團眾之心也。殊為失計。且此一二千人者。亦將何所位置耶。中丞委通判裕麟往瀏陽查辦。繼遣典史孔昭文。武舉諸殿元。改裝易服。到彼處詳悉查探。其途間稟報附閱。令又得邱惺庵先生書。所言似可照辦鈔閱。然此事若付之庸人。必不能了。且恐損威失體。釀成後禍。

老兄旋師之後即請由平江小路馳赴瀏陽縣駐營其地大張告諭合徵義團衆速將滋事各犯獻出一面傳知鄰團集勇併力剋期會剿一面札平江縣將各隘口嚴加防堵毋令被剿各匪竄逸該匪等四面受敵勢必不支其死黨聞不過數百人亦必聞風知畏且徵義堂之人其有身家而安本分者計不下三分之二必不樂護黨逞兇自取誅戮網獻之舉或在意中即不然因各團之勢四面兜剿似亦無難成事此股偏近省城又蓄謀已久不早爲之所實爲可慮謹將思慮所到者條件左方伏乞留意此時中丞不欲聲張慮有洩漏院司道府衙門俱有該堂之人而該縣署中則隨處皆是故尊處亦不及札飭俟到瀏陽後補札送來可也

彈劾欽使辱命請正法疏

張之洞

翰林院侍讀臣張之洞奏爲要盟不可曲從禦侮宜早籌計謹熟權利審披瀝上陳仰祈聖鑒事竊臣近閱邸抄因俄國定約使臣辱命有廷臣集議之旨所有條約傳閱大概臣竊不勝憤懣謹將此約從違利害縷晰爲我皇太后皇上密陳之

新約十八條他姑勿論其最謬者如陸路通商由嘉峪關西安漢中直達漢口秦隴要害荆楚上游盡爲所據馬頭所在支蔓日甚消息皆通邊圉難防堂奧已失不可許者一東三省國家根本伯都訥吉林精華若許其乘船至此即與東三省全境任其遊行無異陪京密邇肩背單寒是於綏芬之西無故自蹙地二千里且內河行舟乃各國歷求而不得者一許俄人效尤踵至不可許者二朝廷不爭稅課體卹商民若準回兩部蒙古各盟一任俄人貿易概免納稅華商日困猶未也以積弱貧苦之蒙古徒供俄人盤剝以新疆鉅萬之軍餉徒爲俄人委輸且張家口等處內地地方開設行棧以後逐漸推廣設啓戎心萬里之內首尾銜接不可許者三中國屏藩全在內外蒙古沙漠萬里天所以限俄人即欲犯邊迤北一面總費周章如蒙古臺站供其役使彼更將重利以啗蒙人一旦有事音信易通糧餉無阻勢必煽我藩屬爲彼先導不可許者四條約載俄人准過卡倫三十有六延袤太廣無事而商往則譏不勝譏有事而兵來則禦不勝禦不可許者五各國商

買從無言許帶軍器之例今無故聲明人帶一槍其意何居若干百爲羣閩然竟入是兵是商誰能辨之不可許者六俄人商稅種種取巧如各國希冀均沾漢關稅課必然歲絀數百萬不可許者七同治三年新疆已經議定之界可以內侵斷我南通北城之路新疆形勢北路荒涼南城富庶爭礮瘠瘵膏腴務虛名受實禍不可許者八伊犁達爾布哈臺科布多烏里雅蘇臺喀什噶爾烏魯木齊古城吐魯番哈密嘉峪關等處准設領事官是西域全疆盡歸控制有洋官斯有洋商有洋商斯有洋兵初則奪我權勢繼則反客爲主馴之彼有官而我無官彼有兵而我無兵且各國通例惟沿海邊疆准設外邦領事若烏里雅蘇臺科布多烏魯木齊古城哈密嘉峪關乃我境內地今日俄人作俑設若各國援例將十八省腹地遍布洋官不可許者九所還伊犁三面山嶺內卡倫外盤踞如故據高臨下險要失矣割霍爾果斯河以西格爾滿以北開懇無區畜牧無所地利失矣金頂寺久爲俄人市廛現與約定俄人產業不便交還是伊犁一綫東來之路必穿俄巢出

路盡矣寥寥遺民彼又遷之以往人民空矣擲二百八千萬有用之財索一無險隘無地利無人民無出路之伊犁將安用之不可許者十俄人索之可謂至貪至橫崇厚許之可謂至謬至愚皇太后皇上赫然震怒遣使臣下廷臣集議可謂至明至斷上自樞密總署王大臣以及凡百官僚人人皆知其不可所以不敢出言改議者誠懼一經定議又改或啟釁端然臣以爲不足懼也必改此議不能無事不改此議不可爲國請言改議之道其要有四一日計決二日氣盛三日理長四日謀定何謂計決無理之約使臣許之朝廷未嘗許之崇厚誤國媚敵擅許擅歸國人皆曰可殺者也伏望拿交刑部明正典刑治使臣之罪卽可以杜俄人之口按之萬國公法既有不准違訓越權之例復有臣執全權可否仍主朝廷之條正與崇厚不遵密函不請諭旨之罪相合者英之獄成憲昭然故云誅崇厚則計決何謂氣盛俄人欺我使人孤懦逼脅畫押施一償百意猶未饜不料俄羅斯覘然大國乃敢出此不特中國憤怒卽環海萬國亦必不直其所爲俄使不待約言聲

明歸國外洋亦無此况例凱湯德係署理公使豈能擅歸其爲恫喝無實情形顯
然儘可任其去留不必過問莫如明降諭旨將俄人不公不平臣民公議不願之
故布告中外行文各國平其曲直兼飭會堂將我國家情理兼盡之處刊入新聞
明諭邊臣整備以待據衆怒難犯之情執中國必不能從之志俄國雖大自與土
耳其苦戰以來師老財竭臣離民怒近歲其國王屢有防人行刺之事若更渝盟
犯順圖遠勞民必且有蕭牆之禍行將自斃焉能及人故明示中外則氣盛何謂
理長種種要狹皆由伊犁而起若盡如新約所得者伊犁二字虛名所失者新疆
二萬里之實際而每年尙耗四五百萬之餉需以供邊帥防軍建城開渠之用是
有新疆不如無新疆也索伊犁而盡拂其情卽曲在我還伊犁而仍責以言則曲
在彼况使臣畫押未奉御批未頒御寶一如載書未款豈足爲憑俄人理屈詞窮
焉能生釁故緩索伊犁則理長何謂謀定俄人而講信義兵端可以不開若俄人
必欲背公法棄和好設防之處大約三路一新疆一吉林一天津左宗棠席屢勝

之師兵力素強金順劉錦棠錫綸張曜亦皆健將以靜待動俄人必敗聯絡喇嘛
棍噶札空參遏其歸路彼將隻輪不返若出吉林過地遼遠林木叢雜其地去俄
都二萬里孤軍深入饋餉艱難不能用衆特簡才兼文武之將予以重權資以軍
餉分南北洋防海之半爲經略東三省之費命左宗棠金順調直隸東三省之兵
之將東來聽用招集索倫赫津打牲人衆教練成軍其人素性雄勇習與俄鬪定
能制勝卽小有挫衄堅守數日必解而去天津一路逼近神京然俄國兵船扼於
英法口例向不能出地中海卽強以商船載兵而來亦非西洋有鐵甲船者比李
鴻章高勛重寄歲糜數百萬金錢以製器械而養淮軍正爲今日若并不能一戰
安用重臣伏請嚴飭李鴻章諭以計無中變責無旁貸及早選將練兵仿照德國
新式增建礮臺戰而勝則酬以公侯之賞不勝則加以不測之罰設卽以贖伊犁
二百八十萬金雇募西洋勁卒亦必能爲我用俄人驚食回疆併吞浩罕意者拊
印度之背不特我之患亦英之憂也李鴻章若以此開悟英使輔車唇齒當視同

仇近年立功宿將如彭玉麟楊岳斌鮑超劉銘傳善夔岑毓英郭松林宋慶壽昌彭楚漢郭寶昌曹克忠李雲麟陳國瑞等或現任或退閒或處廢籍如酌量宣召出京詳議籌策分駐京通津沽及東三省以備不虞山有猛虎自可建威消萌故修武備則謀定臣非敢迂論高談以大局為孤注惟深臣此變日益艱難西洋撓我權政東洋思啟封疆今俄人又故挑釁端若更忍之讓之從此各國相逼而來至於忍無可忍讓無可讓又將奈何無論我之禦俄本有勝理即或疆場之役利鈍無常臣料俄人雖有戰而不能逾嘉峪關雖有勝而不能薄寧古塔終不至掣動全局曠日持久頓兵乏食其勢自窮何畏之有然自及今一失乃中國強弱之機尤人材消長之會此時猛將謀臣足可一戰若再閱數年左宗棠雖在而年已衰李鴻章未衰而亦已老精銳漸盡欲戰不能而俄人則已城於東屯於西行棧於北縱橫窟穴於口之內外通兩藏脅朝鮮不於今日捍之於藩籬而於他日鬪之於庭戶悔何及乎要之武備者改議宜修不改議亦宜修伊緩者改議宜緩不改議亦宜緩崇者改議宜誅不改議亦宜誅此中外羣臣之公言非臣一人之私言也輔謀在疆臣作氣在百僚據理立辨在總理衙門而決計獨斷始終堅持則在我皇太后皇上事關宗社大計坐視不能緘默不敢仰懇將臣此疏一併發交廷臣會議不勝憂憤迫切之至伏乞皇太后皇上聖鑒謹奏

到宜川任觀風示

樊樊山

為到任接風兼考甄別事照得宜川雖係偏隅科名不乏自咸同以後兵歲兩荒井邑蕭條民居蕩析不但農田草宅兼之藝圃荒蕪官師既失教於前士子更因循於下聞前任李出示觀風無一應者亦可見文教之衰而志學者少也本縣來宰是邦與民更始以為教人者非一術而文在所先可愛者非一民而士居其首似此甲科寥落絃誦聲稀年復一年田間無識字之民饜序少讀書之種不亦羞乎是故有識之士不以兵歲兩荒為可憂而以學校一荒為大懼茲特定於二月朔日觀風試士為此示仰闔邑生童知悉屆期務各携持筆硯整肅衣冠齊集縣

銜聽候考試。自茲爲始。旬鍛季鍊。月有常期。其花紅獎賞。由本縣捐廉給發。擇其文理清明。資材秀異者。細加批改。蓋多士躍龍門而上。定成燒尾之魚。鄙人從燕市而來。自比識途之馬。本年欣逢鄉試。有觀光赴舉者。本縣必捐給賓興。爾士子束修不行。師資可得。若猶裹足不前。則吾末如何矣。人文盛衰。視此一舉。其各遵照無違。特示。

復本府問絕糧書

樊樊山

敬稟者。竊四月二十五日。接奉鈞諭。併首府縣公函五紙。因卑縣絕糧一事。曾經卑職函稟中丞。近蒙藩憲諭催查辦。祇誦之下。自慚饒舌。抑下情尙有可白者。卑職去臘抵任。李前令已將滿年丁糧。全數支解。其民欠尾數。抵交卑任催收。乃符牒方行。而呼籲踵至。其未卽完納者。大抵荒絕居多。卑職確切查明。言皆不謬。當以糧額已入奏銷。未便請減。諭令照舊完納。然惻隱之心。焉能勿動。復查荒糧舊卷。見延長張令稟詞。及層憲批示各節。深知此事妨礙太多。挽回不易。雖以憲台

之仁。張令之勇。幾從井而自陷。終畫餅以無成。卑職何人。而敢發難。惟今正上中丞書。略述地方情形。併及荒絕一事。不過以事關民瘼。未敢壁於憲聞。又知此事甫經道憲查復。斷難翻案。是以僅達私函。而不用公牘。但陳苦累。而不言辦法。誠憫其困。而又知其難也。伏蒙中丞軫念窮黎。徑欲入告藩憲。官民兩顧。極意將卑職覆讀公函。苦心如繪。惟云張令前稟。有現戶完絕戶之糧。地令現戶領去。民亦願從之語。是縣無不領之絕地。卽民無代賠之空糧云云。此論非也。北山花戶之累累。在絕糧者半。累在荒糧者亦半。其賠納絕糧者。可以絕地與之。其墊納荒糧者。又將如何。况目前之患。正在人少地多。現戶本分之田。尙未盡闢。與以絕業。誰能種之。是不過改絕爲荒而已。其不利於民如故也。何願從之有哉。公函又云。北山糧額本少。如實欠在一分以下。經征官例得免議云云。似欲將所有之荒糧。作爲一分之民欠。此意甚美。而法未良也。民之多欲。有何窮極。若使其知此意。勢必不荒告荒。不絕告絕。迨查訊得實。而催科之限已逾矣。若其先儘力催收。而以

尾數作為民欠。此尾數中豈無不荒不絕故事拖延者乎。是亦未為公平也。况民之荒熟尚可稽查。官之賢否實難概論。今所謂妥籌熟計通融辦理者。不過暗中補幹。並非顯予豁除也。設有不肖官吏報上則曰實欠一分。取民則仍無短升。合所謂一分者徒歸中飽。無益窮檐。上憲既查不勝。查下民又訴無從。訴是尤不可不慮也。公函又云。如有欠過一分之處。水旱冰雹。近聞時有偏災。亦可據實詳請。緩免云云。此特為被災之地言耳。即如本年雨暘時若。大半綏豐。其欠過一分者。何以處之。若無災而請緩。是不詞也。飾災而求免。是罔上也。而况今年曰災。明年復曰災。此縣曰災。彼縣亦曰災。上台雖肯通融。大部無能疑訝。近來河南州縣。以捏災之故。屢絀彈章。奈何以愛民之公心。而蹈捏飾之私罪。不惟智者不敢。愚者亦不為也。卑職於此事思之甚熟。既無善法。亦無成心。近聞藩憲頗以多事見尤。不知卑職亦本年經征官也。萬一事經入告。查取各官職名。卑職亦在一網之內。並非彰人之過。自市其名也。總之毀譽何定。但期於義無愆。去就甚輕。惟祈於民。

有濟。憲台仁民愛物。慮事周祥。必上能慰憲。廬下紓民困。卑職雖行能無似。猶能奉宣德意。實力遵行。謹率四境之民。延頸企踵。以待明命。緣奉諭以緩辦見囑。恐憲台未悉。卑職慎重之意。又未知卑職上中丞。審命意若何。故敢畧陳其愚。惟憲台察焉。

妄動公帑之咨文

樊樊山

為咨請通飭遵照事。照得各屬兵流各差。歲有常額。本司作令時。偶有不足。皆自行彌補。他屬有請動盈餘者。十九被駁。近年為政尚寬。各州縣動以差繁款絀。在差餘項下支銷。已與餘錢買糧之舊章不合。乃醴泉干令。以該縣盈餘不敷。竟在償款內扣除。辦差之費。若各屬效尤。每月償款。憑何應付。萬一不辦償款。不加此四成差錢。該令又從何扣抵。似此荒唐貪妄。不顧大局。祇便私圖。實堪痛惡。醴泉縣知縣干長華。著撤任示儆。遺缺以舒紹祥署理。並由善後局通飭東西大路各州縣。以後一切差務。不但不能稍侵償款。並不准請動盈餘。缺分優者自行墊賠。

缺苦者。本司自能體恤。如敢效醴泉之尤。有干長華之榜樣。在除牌示外。合行移咨。爲此合咨貴局。煩照來咨事理。希卽通飭各屬。一體遵照辦理施行。

彈劾閣臣請賞舉人

朱侍御

道光癸巳。京畿荒旱。各官倡義勸捐。有潘仕成捐銀一萬二千兩。蒙恩賞給舉人。嗣浙江葉元塋。江蘇黃宜誠。陸續捐輸。亦照例賞給。閣臣遂欲永以爲法。侍御朱公嶠奏云。

竊惟賞賜者。勸善之經。科目者。求賢之道。國家設科取士。三年大比。錄其文藝優長者。貢于春官。名曰舉人。誠盛典也。上年畿輔荒旱。收成歉薄。節荷皇仁。浩蕩賑糶頻施。小民已無虞失所。嗣以日久用繁。各官倡議勸捐。本年二月。據潘仕成捐銀一萬二千兩。蒙恩賞給舉人。一體會試。此皇上逾格之恩。施亦一時從權之至計。原未嘗著爲定例也。且潘仕成本係副貢。去舉人一間耳。賞給舉人。是於破格之中。仍寓量才之意。斟酌而行。豈漫然哉。厥後葉元塋。黃立誠。陸續報捐。經巡視

給事中順天府尹奏請議敘。蒙勅下大學士軍機大臣會議。遂乃比照銀數。請賞舉人。雖曰以昭畫一。然于聖主慎重名器之心。因時權衡之道。要未能深詳體究也。若因此遂成定例。臣竊謂適足生富家僥倖之心。而阻寒儒進修之志。向來捐例。京官自郎中。外官自道府以下。皆准捐至清要衙門。非舉人出身者。不得與焉。官可捐而出身不可捐也。今以捐銀捐賑之故。而得爲舉人。則未登仕版者。將可報捐中書。已列部曹者。又得保送御史。競趨捷徑。濫廁清班。欲肅官廉。亦已難矣。况准其一體會試。則得隴望蜀。謂舉人既可倖邀進士。何難弋獲。于是買通關節。僱請槍替。種種弊端。在所不免。臣故曰。生富家僥倖之心也。至單寒下士。既不能鮮衣華服。奔走形勢之途。又不能遵例納財。置身通顯之地。其所以繫屬心思。鼓舞才力。孜孜以窮經砥行爲務。而未甚厭棄者。良以舉人一途。爲進身之階耳。今若以多士進身之階。爲一時勸捐之計。不論學問之淺深。但較銀數之多寡。如能累萬不啻升三。一經報呈。便同登第。文章不足爲貴。科名亦覺其輕。識趣日卑。術

業日廢。臣故曰阻寒儒進修之志也。頗失士望。徒生倖心。以爲故常未見其可論者。但以請賞花翎。未便率行議准。因而請賞舉人。不知花翎舉人均爲聖朝名器。而細按之。則花翎實器也。舉人虛名也。實器以待有功。虛名以彰有德。互爲表裏。未可低昂。彼輸財助賑者。急公好義。固不可不量加鼓勵。然在士庶。或酌給匾額。或議敘職銜。在官紳。或予以升途。或准其加級。已足示鼓勵。而勸捐輸矣。若請賞舉人。則所得無幾。所傷實多。應請旨飭下順天府五城。及各省督撫。嗣後地方偶遇水旱偏災。如有捐輸應獎之處。概不准援引成案。冒請賞給舉人。庶經制定。而人絕妄心。流品分而士多勵志。而於勸善賑民之道。仍未有礙也。

警勸屬下之牌示

樊樊山

前者彭令承慈。以隴州釐員代理州事。因所報釐金個頭。與賑銀易錢。大相懸絕。詳請記過撤任。嗣後白水缺。輪應彭令請補。本司以係記過人員。特予扣補示儆。

前月彭令回省來見。詢及董故牧身後之事。該令竭力經營。不勝嘉歎。查董故牧回任未久。遽辦灰釘。耄母在堂。病妻在室。孤遺在抱。而囊中不名一錢。且有虧累。該令自代理以來。凡隴州所入。悉以歸之董牧。庖代者一介不取。以千二百金填董故牧虧空。回省之日。攜帶二千金。呈交本司。謂係董任應得之款。請發商生息。以爲孤寡衣食之費。風義如此。敦篤經營如此。周至董故牧。何幸得此良友。吾陝何幸得此賢員。除詳請銷過外。所有扣補白水縣缺。仍以彭承慈更補。以彰公道。本署司粗疏不學。率性而行。心所弗善。教督必嚴。聞人好善喜而不寐。同寅諒之。

調停南北當商爭執論

樊樊山

諭六家當商知悉。照得差局盈餘一項。經本縣於去年十月。遵章撥錢一萬串。發典生息。彼時典肆只有五家。每家各領二千串。九釐起息。具有領狀。息摺在案。今年縣城添設宏中當一座。自應按六股分撥起息。乃新舊當商。不無意見。始則以錢結付新當。而該當不受。繼則以銀合錢付新當。而該當又不受。以致具稟到案。

經本縣批飭鄭紳調處。至今未據處和具覆。以本縣平情論之。城鄉跌票。價各不同。每銀一兩。鄉票換三串三百有奇。城票則不足三串。苦當商欲以鄉票作城票用。宜新當之不受也。至於銀價。去年五家具領時。每兩換三串二三。今年市估。每兩二串九百零。舊當商於今年交銀。而欲照去年作價。又宜新當之不受也。本縣今為爾等調停。着兩局總。在於盈餘項下。另換錢二千串。交新設之宏中當領運。於六月十五起息。新舊六家。每家二千串。勿庸彼此分撥。致啟爭端。自此以後。遇有公款。六家分領。公事六家同辦。值年商首。六家輪充。爾等同鄉同行。誼當和睦。不得以河南河北。自分畛域。除諭飭差局。備錢給領外。仰即會同鄭紳。另換領狀。仍按九釐起息。均勿違延。切切特諭。

監生上控官書局委員詳文

樊樊山

該署咸甯縣知縣樊增祥。審看得監生劉雲巖等。以藉夥回藉各等情。具控官運書局委員羅令一案。緣劉雲巖係湖南長沙縣人。向在涇陽開設鼎裕隆茶莊生

理。與同文書局鋪夥楊詠農。係領一東之本。各設各莊。光緒十七年十月。官書局委員羅令。在同文局購買書籍多種。由楊姓經手。議定價值共合銀八百一十一兩有零。當付現銀二百兩整。嗣楊姓於冬月杪將回湖北。與羅令面訂。明年四月來。陝取銀。由羅令出給六百餘兩銀票一紙持去。至今年四月。並未前來。亦無音信。突有劉雲巖者。前赴書局聲稱。楊姓業已出號。銀歸伊收等語。羅委員因從前交易。並非劉姓經手。若此時將銀付給。將來楊姓來陝。持票取銀。何以應之。至孟傳鑄者。山西孟縣人。向在南院門開設芸香齋書舖生理。與楊詠農同行熟識。去冬官書局購買各書。孟傳鑄陰託楊詠農代為銷售。其同文局所售八百餘金之書籍。有芸香齋一分在內。官書局所出六百餘兩之銀票。有孟傳鑄二百零三兩在內。而羅令不知也。劉雲巖因嫌羅令不付書價之嫌。起意具控。並陰喉孟傳鑄幫控。於是將該舖代芸香齋出售之二百餘金。開除不管。而令孟姓自討。羅令以孟素未見面。亦不付給。於是劉控於前。孟控於後。羣集矢於官書局矣。卑縣接奉憲

札傳集劉孟二人。訊悉前情。並帶赴官書局與羅令當面質明。算清帳目。委議該商等因隔手索價不得。捏情妄控。委員羅令並無不合。以理而論。書爲楊姓所賣。票爲楊姓所持。楊姓不來。銀不票見。萬無給銀之理。但案經上控。款由官發。亦不畏商人訛詐。當諭令劉孟二人各出具結領二紙。一存縣檔。一移送書局備查。將來楊姓到陝。不得異言。銀票若出。作爲廢紙。均於結內註明。惟查所購六百餘金之書籍。其中滯銷者甚多。當此局用支絀。未便以有用之錢。購無用之書。隨諭令該商等照依原定價值。領銀一半。退書一半。計同文局應領銀四百零八兩。今發給銀二百兩整。芸香齋應領銀二百零三兩。今發給銀一百兩整。下餘書價。各將原書發回。照單點交。分別給領。在該商等隔手索銀。本屬無理。而猶敢以無理之詞。上控職官。本應薄責示儆。姑念俯首認咎。曲予寬容。除取具各結。分別存案外。所有審訊緣由。理合與奉發原詞。一併具詳。申請憲台鑒核銷案。爲此具申。伏祈照詳施行。

彈劾李蓮英三凶等罪狀

沈北山

爲應詔直言。敬祈據呈代奏事。竊職伏讀九月初二初五等日上諭。因旱災將成。詔諸臣各抒讜論。冀迓和甘。仰見朝廷宵旰憂勞之意。職隨於二十一日。恭具一疏。當堂齎呈。冀得代遞。以未合體制。格不得上。今者畿內雨澤既降。目下似可以無言矣。然甘霖不降。四野亢旱。民生之憂。國家之憂也。不得不言也。三凶在朝。上倚慈恩。下植徒黨。權震天下。威脅士民。包藏禍心。伺隙必發。危及至尊。四海懸心。切於剝膚盜賊。於是乎竊伺強敵。於是乎覬覦尤君父之隱憂。國家之鉅患也。忍待禍畏罪。而不言乎。况我朝納言之盛。超越百代。乾隆朝孫嘉淦以自是規高宗。道光朝袁鏡以寡慾規宣宗。而倭仁勝保蘇廷魁諸人。並直言不諱於文宗之朝。此皆匡言主德。直陳無隱。主聖臣直。著爲美談。而我朝之糾舉大臣者。有若李之芳。之劾魏裔介。彭鵬之劾李光地。而彈劾權姦者。如郭琇之參明珠。錢澧之參和坤等。當時皆侃侃直言。不避權貴。是以貪橫斂跡。聖治昌明。欽惟我皇太后皇上。

敬承祖制宵旰求言又何忍於聖主之前而緘默不言乎謹即前疏所言而益增其未備請爲皇太后皇上陳之竊聞大易所言乾爲君位史官所記日爲君象此中國數千年相傳之恆說也萬古來垂簾之政則惟宋之宣仁太后治稱極盛此外若漢之和熹鄧皇后亦有美政紀於簡編然考其時皆國君嗣服尙在冲齡始舉此制故漢安帝之年稍長杜根卽有諫言而宋章獻太后之時范仲淹亦嘗諍之若今日我皇上之臨天下也二十餘年矣而去秋八月臣下猶恭奉皇上籲請皇太后訓政者此惟聖母止慈皇聖止孝度越萬古超越尋常或謂皇上因遣通臣康有爲之變而籲請皇太后以持國計度今一年以來皇太后之調護聖躬而訓啓聖聰者當已聖德日隆而聖體日康矣爲皇太后計則歸政之時也惟今日者或謂皇上以時事多艱而欲仰承乎慈訓皇太后亦有國事爲重而畧形迹之嫌疑此則聖慈聖孝亘古同昭臣下豈敢有他說獨是此後皇上聖躬之安否如何天下萬世不能不以爲皇太后之責任何則必是魯恭袁敞揚震以爲之臣而

後得成和熹之治又必有司馬光呂公著文彥博以爲之臣而後得成宣仁之治况司馬光呂公著諸人雖奉宣仁太后以爲政其於宋帝固無纖芥之嫌也若今三凶在朝憑權藉勢上託聖慈之倚畀隱與君上爲仇讐而其餘之以世僕而快快於少主以黨闈而竊竊患失者咸有不利其君之心以希永保富貴之計核其情狀往往而然而三凶又爲之魁三凶者何大學士榮祿大學士剛毅太監李蓮英是也榮祿少以妄近言聽廢斥多年過十年間重躋通顯不念皇上錄用之恩而以倒行逆施爲事方其爲步軍統領也已上恃皇太后之親下恃禮親王之戚玩視朝旨三令不從比任北洋不及半年激怒皇上幾欲加誅夫人臣而爲聖主所欲殺則其平日之跋扈可知今則內掌樞機外握兵柄夫自古及今內外之權不相侵將相之柄不兼攝誠以防主弱臣強禍生不測也曹操於漢有此權則凌君矣司馬昭於魏有此權則弑主矣今榮祿歸爲軍機大臣而又節制武衛五軍北洋各軍近聞蘇元春練兵江南亦旣節制兵權之盛蔓延及於南洋而且督撫

保人才則歸其差遣外省造利器則供其軍械威柄之重震動大下我朝所有權臣如鼇拜明珠年羹堯端華肅順之徒均無此勢力使榮祿於此或生異心未識皇太后何以爲皇上地也即令榮祿此時初心可保而此後則勢成騎虎不得復下武夫患失必起姦謀禍變之來未知所底夫古來史策所載權臣恃母后而不利其嗣君者不少也况今日榮祿之於皇上乎此可慮者一也剛毅外託清廉內實貪鄙風聞其平日嘗通餽遺於闕寺設典肆於都門旣爲軍機大臣則開陳上心善回天聽是其責也乃去秋皇上變法之時剛毅輒抗違激撓以致怒擲章奏故去秋之變平情衡論亦由剛毅輩激成之迨皇太后訓政之初剛毅首以殺戮士人鈎稽黨籍爲務幸而皇太后聰明仁恕祇戮數人不事株連若充剛毅之居心不至盡殺士類不止夫士與民國家之赤子聖主所愛惜者也乃剛毅之籌餉江南也則任不肖官吏肆意追呼閭閻驚擾而又裁撤學堂摧傷士氣省數萬有限之款灰百千士子之心夫江南士民感戴皇上紀誦聖德一聞中外之訛言輒

用怵惕而憂疑其用情雖愚其愛君則摯剛毅必指爲漢奸擢夷挫辱夫人一念愛君即爲漢奸擢夷挫辱必欲致之死地而後快則必仇視皇上腹誅聖德而後爲大清之良民國中之良士是則率國人而叛皇上者剛毅也其設心于皇上爲何如乎此可慮者二也歷古以來如漢如唐如明皆有宦官之禍漢之宦官如曹節侯覽張讓等明之宦官如王振汪直劉瑾魏忠賢等皆攘竊威權荼毒臣民而以圯其國然此其人皆志在蒙蔽天子以成其奸故尙無弑逆之事惟唐之宦官廢立由其專擅弑逆出於倉猝若憲宗則弑於陳宏志之手若敏宗則死於劉克明之手寺人謀逆可爲寒心我朝懲前毖後家法森嚴闈尹小人不得與政事防維杜漸宜無漢末明季之患矣而今之李連英者以一宦寺而屢經彈劾罷官去者已非一人風聞該太監已有資數百萬夫不由貪婪此財何由而得不竊作威福又何以遂其貪婪今日者結天下之公憤召中外之流言上損我慈聖之盛名下啓彼逆臣之口實其爲罪惡已不勝誅而其最可慮者此日隱患伏於宮禁之

間異日必禍發於至尊之側蓋李蓮英之所恃者皇太后而其所不快者我皇上也故比年來頤和園奔走之官僚內務院執事之臣僕凡得輾轉通該太監之聲氣者以及臣僚等本因該太監起家而數與往來者無不指斥乘輿無詆誹聖德也然則該太監之設心慮慮於皇上爲何如乎唐憲宗之於陳宏志未嘗欲誅之也而宏志卒弑之以服藥暴崩告矣唐敬宗之於劉克明未嘗欲誅之也而克明卒殺之於飲酒滅燭時矣刑餘之人心很手辣自古然也此其可慮者三也此三人行事不同而不利於皇上卒同且權勢所在人爭趨之今日凡旗員之掌有兵柄者卽職不逮榮祿而亦榮祿之黨援也凡旗員之勢位通顯者卽悍不若剛毅而亦剛毅之流亞也而旗人漢人之嗜進無恥者日見隨聲附勢混入於三人之黨時勢至此人心至此可爲痛哭流涕長太息故竊謂不殺三凶以厲其餘則將來皇上之安危未可知也夫此三人在奸日內藏伏慝之謀外託公忠之狀禍患隱微似不可顯言於朝不知涓涓不塞將成江河水之涓涓猶可塞也及爲江河

則一決而不可止而况此三人者惟皇太后能操縱之生殺之皇上之才非敵也今乘皇太后訓政之時分榮祿之權懲剛毅之暴除李蓮英之毒以絕一切不軌之謀弭將來無窮之禍惟在於皇太后一詔令耳若異日者榮祿則黨羽徧滿盡收天下之勁兵剛毅則貪暴恣睢挫天下之士氣李蓮英則盤踞於內患生肘腋防不勝防奸命滿朝內外一氣此時我皇上孤立於上惟有委政權強聽命眷小或可圖日夕之安一有暴端則危難立至此時卽有效忠者亦何異在董卓朱溫之前保漢唐之主尙何濟哉春秋傳曰無使滋蔓蔓難圖也正此謂也伏願皇太后皇上聽曲突徙薪之說懍滋蔓難圖之義亟收榮祿之兵權而擇久任督撫忠懇知兵者分領其衆懲剛毅之苛暴而用慈祥仁恕之人李蓮英閹尹小人復何顧惜除惡務盡不俟終朝如此則皇上安於泰山可以塞天下之望矣且非獨爲皇上計也今天下時勢尤甚可危矣自各口通商以來西洋天主耶穌等教傳行中原各省之民入其教者通計何止數百萬人自粵捻回匪平安以來各省裁

撤之兵流爲哥老會匪二十年來輾轉勾引日聚日衆蹤跡詭祕不可究詰東南各省無地無之而各省之劇賊積盜竊伏充斥比年來焚教堂戕教士乘隙肇亂者層見迭出夫以各省教會各匪劇賊積盜之潛伏於下者如此之多設朝廷一日有事必皆乘間竊發揭竿而起若彼西洋各國約縱連橫得寸得尺大欲無厭孰不願有事以收漁人之利豈真有一國可恃南宋恃元卒覆於元此殷鑒也竊謂權強在朝刁璫在內則主權弱而禍變不可知一有禍變則盜賊起而天下亂外人於是乘間此割削我中國不有明末流寇之憂則有晉末五胡之禍而時雖食榮祿剛毅李蓮英諸人之肉亦何足以謝天下然則今日願我皇太后皇上思患預防懲治權姦者所以保聖躬卽所以固大清基業以此固普天忠憤之人所欲流涕爲皇上告職之所爲不惜首領而陳此言也伏願據職愚悃代陳於聖主之前抑職再有請者論語云邦有道危言危行邦無道危行言孫今皇太后皇上孜孜求治達聰明日采及芻蕘若慮觸忌犯諱而不使上陳非所以處有道之邦

對聖明之主若慮妄言妄聽則聖明燭照自有權衡固無庸小臣代爲慮及且伏考本朝掌故若咸豐七年編修劉其年呈請禁絕京城錢票繩以嚴刑當時掌院大臣以其所見迂謬詳加開導劉其年堅請代奏直待顯皇帝明諭申飭劉其年始無異言可見當時芻蕘之陳必達聖聽職謹援此例披瀝具陳堅請代奏至於狂瞽之論干冒震嚴以及屢次公堂曉曉例請已干大不敬之律蹈不諳讀之愆並請中堂奏聞朝廷嚴刑治罪無所推諉職不勝區區之誠謹具呈乞代奏皇太后皇上聖鑒謹呈

彈劾李鴻章罪狀

史維峻

奏爲疆臣跋扈戲侮朝廷請明正典刑以尊主權而平衆怒恭摺仰祈聖鑒事竊北洋大臣李鴻章平日挾北洋以自重當倭賊犯順自恐寄頓倭國之私財付之東流其不欲戰固係隱情及詔旨嚴切一意主戰大拂李鴻章之心於是倒行逆施接濟倭賊煤米軍火日夜望倭賊之來以實其言而於我軍前敵糧餉火器故

意勒措之有言戰者動遭呵斥聞敗則喜聞勝則怒淮軍將領望風希旨未見賊先退避偶遇賊即驚潰李鴻章之喪心病狂九卿科道亦屢言之臣不復贅陳惟葉志超衛汝貴均係革職拿問之人藏匿天津以督署爲逋逃藪人言嘖嘖斷非無因而於拿問之丁汝昌竟敢代爲乞恩並謂美國人有能作霧氣者必須丁汝昌駕馭此等怪誕不經之說竟敢陳於君父之前是以朝廷爲兒戲也而樞臣中竟無人敢爲爭論者良由樞臣暮氣已深過勞則神昏如在雲霧之中霧氣之說入而俱化故不覺其非耳張蔭桓邵友濂爲全權大臣未明奉諭旨在樞臣亦明知和議之舉不可對人言既不能以死生爭復不能以去就爭祇得爲掩耳盜鈴之事而不知通國之人早已皆知也倭賊與邵友濂有隙竟敢索派李鴻章之子李經芳爲全權大臣尙復成何國體李經方爲倭賊之壻以張邦昌自命臣前劾之若令此等悖逆之人前往適中倭賊之計倭賊之議和誘我也我既不能激厲將士決計一戰而乃首俯聽命於倭賊然則此舉非議和也直納款耳不但悞國

而且賣國中外臣民無不切齒痛恨欲食李鴻章之肉而又謂和議出自皇太后意旨太監李蓮英實左右之此等市井之談臣未敢深信何者皇太后既歸政皇上矣若猶遇事牽制將何以上對祖宗下對天下臣民至李蓮英是何人斯敢干預政事乎均果屬實律以祖宗法制李蓮英豈復可容惟是朝廷被李鴻章恫喝未及詳審利害而樞臣中或係李鴻章私黨甘心左袒或恐李鴻章反叛姑事調停初不知李鴻章有不臣之心非不敢反實不能反彼之淮軍將領皆貪利小人無大伎倆其士卒橫被剋扣則皆離心離德曹克忠天津新募之卒制服李鴻章有餘此其不能反之實在情形若能反則早反耳既不能反而猶事挾制朝廷抗違諭旨彼其心目中不復知有我皇上並不知有皇太后而乃敢以霧氣之說戲侮之也臣實恥之臣實痛之惟冀皇上赫然震怒明正李鴻章跋扈之罪布告天下如是而將士有不奮興倭賊有不破滅即請斬臣以正妄言之罪祖宗監臨臣實不懼用是披肝膽冒斧鑕痛哭直陳不勝迫切待命之至謹奏

彈劾魏忠賢罪狀

楊 漣

臣惟太祖高皇帝首定律令。內臣不許干預外事。其在內庭。祇供使令灑掃之役。違者法無赦。故在內官。惟以循謹奉法爲賢。聖子神孫。相守未敢有改。雖有驕橫縱恣。王振劉瑾其人。旋即誅戮。故國祚靈長。至今豈意聖明在上。乃敢有肆無忌憚。濁亂朝常。罔上行私。傾害善類。損皇上堯舜之令名。釀宗社無窮之隱禍。如東廠太監魏忠賢其人者。舉朝盡爲威劫。無敢指名糾參。臣實聞之。臣前以兵科給事中。親承先帝之命。輔皇上爲堯舜之君。言猶在耳。今若亦畏禍不言。是臣自負忠直初心。并負風紀職掌。負皇上起臣田間特恩。他日何面目以見先帝於天。謹撮其大罪之著者二十四款。爲我皇上陳之。忠賢原一市井無賴人。耳中年淨身。資入內地。非能通文理。自文書司禮起家者也。皇上念其服役微勞。拔之幽賤。寵以恩禮。原名進忠。改命今名。豈非欲其顧名思義。忠不敢爲奸。賢不敢爲惡者。乃切猶謬爲小忠小佞。以倖恩。既乃遂爲大奸大惡。以亂政。祖宗之制。以上擬托。

重閣臣非但令其靜心參酌。權無旁分。正使其一力擔承。責無他卸。自忠賢專擅。旨意多出。傳奉傳奉。而真一字抑揚之間。判若天淵。傳奉而僞。誰爲辨之。近乃公然三五成羣。勒逼講壇。政事之堂。幾成鬩市。甚至有徑自內批。不相照會者。假若夜半出片紙。殺人皇上不得知。閣臣不及問。害豈渺小。以致閣臣鬱鬱。嘆悶有堅意。求去者。敗祖宗二百餘年之政體。大罪一也。舊閣臣劉一璟。家臣周嘉謨。同受顧命之大臣也。一璟親捧御手。首定大計。嘉謨倡率百官。於松棚下義斥鄭養性。立寢后。封以宮禁。皇上豈遂忘之。忠賢交通孫杰。論去急於剪已之忌。不容皇上不改父之臣。大罪二也。先帝強年登極。一月賓天。進御進藥之間。普天實有隱恨。執春秋討賊之義者。禮臣孫慎行也。明萬古綱常之重者。憲臣鄒元標也。忠賢一則逼之告病去。一則嗾言官使劾去。至今求南部片席。不可得。顧於護黨氣。歐聖母者之人。曲意綢繆。終加蟒玉以贈。其行是何親於亂賊。何仇於忠義。偏不容先朝有痛念弓鼎之老臣。大罪二也。王紀鍾羽正。先年功在國本。及紀爲司寇。執法。

如山羽正爲司空清修如鶴忠賢一則使人喧囂於堂辱而迫之去一則與沈淮交構陷之削籍去至今請一復職起用不可得願於架媚善附之人破格點用驟加一品以歸是真與我善者爲善人與我惡者爲惡人必不容盛時有正色立朝之直臣大罪四也國家最重無如枚卜忠賢一手握定力阻首推之孫慎行盛以私更爲他辭以錮其出豈真欲門生宰相乎妄預金甌之覆字竊作貂座之私情大罪五也爵人於朝莫重廷推去歲南太宰北少宰推皆點陪一以蓋枚卜點陪之案一以伏借用爲逐之奸致一時名賢不安俱去顛倒有常之銓政掉弄不測之機權大罪六也聖教初新正資忠直乃滿薦薦文震孟鄭鄮熊德陽江秉謙徐大相毛士龍侯震暘賈繼春等九人抗論稍忤忠賢傳奉盡令降斥屢經恩典竟阻賜環長安謂皇上之怒易解忠賢之怒難饒大罪七也然猶曰外廷之臣子也上年皇上南郊之日傳聞宮中有一貴人以德性貞靜荷皇上寵注忠賢恐其露已驕橫狀謀之私比託言急病立刻掩殺是皇上且不能保其貴幸矣大罪八也

猶曰無名封也裕妃以有喜傳封中外欣欣相告矣忠賢以抗不附已屬其私比捏倡無喜矯旨勒令自盡不令一見皇上之面昔堯以十二月而生假令當日裕妃幸存安知不爲堯母是皇上又不能保其妃嬪矣大罪九也猶曰在妃嬪也中宮有慶已經成男凡在內廷當如何保護乃繞殿流虹之祥忽化爲飛星墮月之慘傳聞忠賢與奉聖夫人實有謀焉以皇上麟趾開祥何妨斯男則百而忠賢包藏禍心若此是皇上亦不能自保其第一子矣大罪十也至於先帝之在青宮四十年操心慮患所與護持孤危威劫之不動利誘之不變者唯王安一人耳登極一月皇畿安寧不可謂無功皇上倉卒受命雍衛防護安亦不可謂無微忠即使有罪亦當聽皇上明正其罪與天下共見之而忠賢以私忿矯旨掩殺於南海且身首異處肉飽狗彘是不但仇王安而實敢於仇先帝之老奴與皇上之老犬馬而略無顧忌也此後內臣誰肯復爲忠義者其餘大小內臣無罪而擅殺擅逐者又不知其數千百也大罪十一也因而欲廣願奢今日討獎賞明日討祠典要挾

無窮。王言屢襲。近又於河間府毀人居屋。起建牌坊。鏤烈雕龍。干雲插漢。築愁築怨。飲恨吞聲。又不止於瑩地。擅用朝忠。規制僭擬。陵寢而已。大罪十二也。今日蔭錦衣。明日蔭中書。金吾之堂。口皆乳臭。誥勅之館。目不識丁。如魏良弼。魏良材。魏良卿。魏希孔。及外甥野子。傅應星等。五侯七貴。何以加茲。不知忠賢有何軍功。有何德行。亦甚褻朝廷之名器矣。大罪十三也。因而手滑胆粗。用立枷之法。以示威前歲。枷死皇親家人數命矣。其枷號家人者。欲扳陷親皇也。其扳陷皇親者。欲動搖三宮也。當時若非閣臣力爲護持。言官極爲糾正。椒房之戚。久興大獄矣。大罪十四也。良鄉生員章士魁。卽有他罪。自有提學。乃以爭煤密傷其墳脈。託言開礦而傷矣。假令盜長陵一坯土。何以處之。趙高鹿可爲馬。忠賢煤可爲礦。大罪十五也。王思敬。胡遵道。侵占牧地。果真小則付之有司。大則付之撫按。學院足矣。而徑拏黑獄三次。拷掠身無完膚。以皇上右文重道。秋爽幸學。而忠賢草菅士命。使青燐赤碧之氣。先結於壁宮。泮藻之間。孔子之神。將無怨恫。大罪十六也。科臣周士

樸。執糾織監一事。原是在工言工。忠賢徑停其陞遷。使吏部不得守其銓除。言之不敢。司其封駁。儉邪因之以偷換手眼。那移陞敘。致士樸卒困頓以去。於以城中官之尊大得矣。而聖朝則何得有此名色。大罪十七也。北鎮撫臣劉僑。不肯殺人。媚人自是在刑。慎刑忠賢。以其不甚鍛鍊。竟令削籍。明示大明之律令。可以不守。而忠賢之意旨。不可不遵。將使羅鉗吉綱。然後快心。於以彰忠賢之威焰得矣。而國脈則何得崇此蘊毒。大也。罪十八。魏科臣中大到任。已奉明旨。鴻臚報單。忽傳詰責。及科臣回語。臺省交論。又再襲王言。幾成解訓。無論玩弄言官於股掌。而皇天語提起。放倒信手。任心令天下後世視皇上爲如何。主大罪十九也。東廠原以察奸緝細。非常非擾平民也。自忠賢受事。鷄犬不甯。而且直以快恩仇。行傾陷野子。傅應星爲之招搖。引納陳君慕爲之鼓舌。搖唇傳繼。教爲之投匭。打網片語。違憚則駕帖。立下。至近日之於中書。汪文言不從閣票。不會閣知。不理閣政。而應星等造謀告密。猶日夜未已。勢不至與同文之獄。刊黨錮之碑。不已者。當年西廠

汪直之橫恐未足語此大罪二十也國內未靖內外戒嚴東廠訪緝何事前韓宗功潛入長安打點實往來忠賢司房之家事露始令避去假令天不悔禍宗功奸細事成一旦兵逼城下忠賢固爲口口首功之主人矣其發銀七萬兩更創肅寧縣新城誠可作郿塢深藏不知九門內外生靈安頓何地大罪二十一也土者守在四口祖制不蓄內兵卽四衛之設備而不操原有深意忠賢謀同奸相沈淮創立內操不但使親戚羽黨交互盤踞其中且安知其無大盜刺客東藏西匿之人寄名內相家丁偷或伺隙謀亂發於肘腋智者不及謀勇者不及拒識者每爲寒心忠賢復傾財厚與之交結昔劉瑾招納亡命曹吉祥弟姪傾結達官忠賢蓋已兼之不知意欲何爲大罪二十二也且皇上亦見近日忠賢進香涿州之景象乎鐵騎之擁簇如雲蟒玉之追隨耀日警蹕傳呼清塵墊道人人以爲駕幸涿州及其歸也以輿夫爲遲改駕四馬羽幢青蓋夾護雙遮已則儼然乘輿矣其間入幕密謀叩馬管策者實繁有徒忠賢此時自視爲何如人想只恨在一人下耳不知

更作何轉念恐泰山之神必陰殛之矣大罪二十三也皇上更不記前日忠賢走馬大內之氣象乎寵極則驕恩多成怨聞今春忠賢馳馬御前皇上曾射殺其馬待忠賢以不死聖恩已厚忠賢不自伏罪請死且聞進有傲色退有怨言朝夕隄防介介不釋心腹之人時時打點從來亂臣賊子只爭一念放肆遂至收拾不住皇上果真有一事奈何養虎兇於肘腋間乎此又寸鬻忠賢不足盡其辜者大罪二十四也凡此逆跡皆得之邸報與長安之共傳共見非出於風影意度者忠賢負此二十四大罪懼內廷之發其奸殺者殺換者換左右旣畏而不敢言懼外廷之發其奸逐者逐錮者錮外廷又皆觀望而不敢言更有一種無識無骨苟圖富貴之徒或扳附枝葉或依託門牆或密結居停或投誠門客逢其所喜挑其所怒無所不至內有授而外發之外有呼而內應之向背忽移禍福立見間或內廷奸狀敗露有奉聖容氏爲之彌縫其罪戾而遮飾其回衷故掖廷之內知有忠賢不知有皇上都城之中知有忠賢不知有皇上卽大小臣工積重之所移積勢之所

趨亦不覺其不知有皇上而只知有忠賢每見中外有緊急當做之事當起用之人必曰要與內邊說說或人不得用事不得行亦只說內邊不肯宮中府中大事小事無一不是忠賢專擅即奏章之上反覺皇上爲名忠賢爲實且如前日忠賢已往涿州矣一切事情必星夜驅請一切票擬必忠賢既到始敢批發嗟嗟天顏咫尺之間不請聖裁而馳驅候忠賢意旨於百里之外事勢至此尙知有皇上耶無皇上耶有天日耶無天日耶天祚聖明履行譴告去年以熒惑守斗告今年以長日風霾告又以一日三地震告而乾清之震尤甚皆忠賢積陰蔽陽之象聖明偶不及覺察反加之恩而忠賢閱不畏死更甚之惡羽翼已成騎虎難下太阿倒授主勢孤危今爲不治早計臣不知皇上之宗社何所託聖躬之安危何所託三宮九嬪之安危何所託而如此毒心辣手膽橫已不能爲下心棘必不肯容人即普天共戴之皇子元良託重之貴妃能保時得其懽心而不犯其所忌臣又不知貴妃皇子之安危何所託萬一少有差池臣即欲以死報皇上亦復何及伏念皇

上天縱聰明春秋鼎盛生死予奪豈不可以自主何爲受制么麼小豎令內外大小俱坐針氈之上而惴惴莫必其命耶臣在兵科時曾參及進忠名在御前蓋實有見於忠賢狼子野心不可嚮邇不意聖明斷之不蚤養成今日偷復優遊姑息再念其追侍舊人客氏又從旁巧爲營解不即加處治小不忍則亂大謀臣不能爲皇上策矣高皇帝洪武十年有內侍以久侍內廷從容言及政事上即日斥遣隨諭羣臣曰漢唐之禍雖曰宦官之罪亦人主信愛之過使然向使宦者不得與兵預政雖欲爲亂其可得乎今此宦者雖侍朕日久姑可息之決然去之所以懲將來也洋洋聖謨中官言及政事且懲將來况忠賢欺君無上惡積罪盈豈容當斷不斷伏乞皇上下奮雷霆將忠賢面縛至九廟之前集大小文武勳戚勅法司逐款嚴訊考歷朝中官交通內外擅作威福違祖宗法壞朝廷事失天下心欺君負恩事例正法以快神人公憤其奉聖夫人客氏亦並勅令居外以全恩寵無復令其流毒宮中其傳應星陳居恭傳繼教並下法司責問然後布告天下暴其罪

狀示君側之惡已除交結之徑已塞如此而天意弗回人心弗悅內治外安不新開太平氣象者請斬臣以謝忠賢臣知此言一出忠賢之黨斷不能容臣然臣弗懼也但得去一忠賢以不誤皇上堯舜之令名卽可以報命先帝可以見二祖宗之靈一生忠義之心事兩朝特達之恩知於願少酬死且不憾惟皇上鑒臣血誠卽賜施行

彈劾嚴嵩罪狀

楊繼盛

臣孤直罪臣蒙天地恩超擢不次夙夜祇懼思圖報稱蓋未有急於請誅賊臣者也方今外賊惟俺答內賊惟嚴嵩未有內賊不去而可除外賊者去年春雷久不聲占曰大臣專政冬日下有赤色占曰下有叛臣又四方地震日月交食臣以爲災皆嵩致請以嵩十大罪爲陛下陳之高皇帝罷丞相設立殿閣之臣備顧問視制草而已嵩乃儼然以丞相自居凡府部題覆先面白而後草奏百官請命奔走直房如市無丞相名而有丞相權天下知有嵩而不知有陛下是壞祖宗成法大

罪一也陛下用一人嵩曰我薦也斥一人曰此非我所親故罷之陛下有一人嵩曰我救也罪一人曰此得罪於我故報之伺陛下喜怒以恣威福羣臣感嵩甚於感陛下畏嵩甚於畏陛下是竊君上之大權大罪二也陛下有善政嵩必令世蕃告人曰主上不及此我議而成之又以所進揭帖刊刻行世名曰嘉靖疏議欲天下以陛下之善盡歸於嵩是掩君上之治功大罪三也陛下令嵩司票擬蓋其職也嵩何取而令子世蕃代擬又何取而約諸義子趙文華輩羣聚而代擬題疏方上天語已傳如沈鍊劾嵩疏陛下以命呂本本卽潛送世蕃所令其擬上是嵩以臣而竊君之權世蕃復以子而盜父之柄故京師有大丞相小丞相之謠是縱姦子之僭竊大罪四也嚴效忠嚴鵠乳臭子耳未嘗一涉行伍嵩先令效忠冒兩廣功授錦衣所鎮撫矣效忠以病告鵠襲兄職又冒瓊州功擢千戶以故總督歐陽必進躡掌工部總兵陳圭游統後府巡按黃如桂亦驟亞太僕既藉私黨以官其子孫又因子孫以拔其私黨是冒朝廷之軍功大罪五也逆鸞先已下獄論罪賄

世蕃三千金薦爲大將鸞冒擒哈呀兒功世蕃亦得增秩嵩父子自誇能薦鸞矣及知陛下有疑鸞心復互相排詆以泯前迹鸞勾賊而嵩世蕃復勾鸞是引背逆之姦臣大罪六也前俺答深入擊其情歸此一大機也兵部尙書丁汝夔問計於嵩嵩戒無戰及汝夔逮治嵩復以論救給之汝夔臨死大呼曰嵩誤我是誤國家之軍機大罪七也郎中徐學詩劾嵩革任矣復欲斥其兄中書舍人應豐給事厲汝進劾嵩謫典史矣復以考察令吏部削其籍內外之臣被中傷者何可勝計是專黜陟之大柄大罪八也凡文武遷擢不論可否但衡金之多寡而畀之將弁惟賄嵩不得不陞削士卒有司惟賄嵩不得不掊尅百姓士卒失所百姓流離毒徧海內臣恐今日之患不在境外而在域中是失天下之人心大罪九也自嵩用事風俗大變賄賂者薦及盜跖疏拙者黜逮夷齊守法度者爲迂疏巧彌縫者爲才能勵節介者爲矯激善奔走者爲練事自古風俗之壞未有甚於今日者蓋嵩好利天下皆尙貪嵩好諛天下皆尙諂源之弗潔嵩何以澄是做天下之風俗大罪

十也嵩有是十罪而又濟之以五奸知左右侍從之能察意旨者厚賄結納凡陛下言動舉措莫不報嵩是陛下之左右皆賊嵩之間諜也以通政司之主出納也用趙文華爲使凡有疏至先送嵩閱然後入御王宗茂劾嵩之章停五日乃上故嵩得展轉遮飾是陛下之喉舌乃賊嵩之鷹犬也畏廠衛之緝訪之令子世蕃結爲婚姻陛下試詰嵩諸孫之婦皆誰氏乎是陛下之爪牙皆賊嵩之瓜葛也畏科道之多言也進士非其私屬不得預中書行人選推官知縣非通賄不得預給事御史選既選之後入則杯酒結歡出則餽金相屬所有愛憎授之論刺歷俸五年無非建白卽擢京卿諸臣忍負國家不敢忤權臣是陛下之耳目皆賊嵩之奴隸也科道雖入籠絡而部寺中或有如徐學詩之輩亦可懼也令子世蕃擇其有才望者羅置門下凡有事欲行者先令報嵩預爲布置連絡蟠結深根固蒂各部堂司大半皆其羽翼是陛下之臣工皆賊嵩之心膂也陛下奈何愛一賊臣而忍百萬蒼生陷於塗炭哉至如大學士徐階蒙陛下特擢乃亦每事依違不敢持

正不可不謂之負國也。願陛下聽臣之言，察嵩之奸，或召問裕、景二王，或詢諸閣臣。重則直憲，輕則勒致內賊。既去外賊，自除雖俺答亦必畏。陛下聖斷不戰而喪膽矣。

